



Komunikadu Imprensa
Dili 27 Novembru 2020

Partisipante treinamentu iha Suku Lourba preokupa ho violénsia sira hasoru fetu no labarik

Iha 18 Novembru 2020, JSMP hala'ó treinamentu kona-ba “Fetu no labarik sira ninia asesu ba iha justisa formal” iha suku Lourba, Postu Administrasaun Bobonaro, Munisípiu Bobonaro.

Treinamentu ne'e partisipa hosi estrutura suku no membru joventude fetu ho joventude mane, hamutuk ema na'in 20 ne'ebé kompostu hosi mane 14 no fetu na'in 6.

Materia ne'ebé apresenta iha treinamentu ne'e kona-ba fetu nia direitu, saida mak violénsia doméstika, Lei Kontra Violénsia Doméstika, prosesu legál no protesau legal no oinsa atu refere kazu violénsia bazeia ba jéneru.

“Treinamentu ne'e nu'udar meu ida hodi ajuda membru konsellu suku sira no joventude fetu ho mane atu iha koñesimentu kona-ba oinsa atu refere kazu sira violénsia bazeia ba jéneru ne'ebé akontese iha sira nia suku no sira mós hatene oinsa prosesu kazu tuir dalan sistema justisa formal. Nune'e sira bele trata no atua problema sira ne'ebé mosu tuir mekanizmu ne'ebé loos no apropriadu,” dehan Diretora Ezekutiva JSMP, Sra. Ana Paula Marçal.

Xefe Suku Lourba, Sr. Lino da Cruz iha nia intervensaun dehan katak nia orgullu ho prezensa JSMP ne'ebé bele partilla informasaun kona-ba asesu ba justisa formal liu-liu relasiona ho kazu hasoru fetu no labarik, tanba iha sira nia suku akontese kazu barak maibé sira rasik ladun hatene oinsa atu prosesu kazu sira ne'e tuir dalan sistema formal.

Reprezenta UNDP ba programa Spotlight, Sra. Nelita Fernandes Ximenes, iha ninia intervensaun haktuir katak Spotlight iha komitmentu atu elemina krime sira hasoru fetu no labarik iha Timor Leste liuhusi atividade sira hanesan suporta fetu no labarik sira asesu ba justisa liuhusi assistensia legal no desiminasau informasaun hanesan treinamentu ohin lora ne'ebé fasilita husi JSMP.

Durante treinamentu, partisipante sira foti kestaun balun relasiona ho asuntu violasaun seksuál ne'ebé envolve ema adultu hasoru menór, autoridade polisia haruka fila kazu violénsia doméstika atu rezolve tuir dalan familiar no aman ne'ebé hola fetu rua no la tau matan ba nia oan sira.

Relasiona ho preokupasaun kona-ba adultu halo abuzu seksuál hasoru menór, JSMP esplika artigu 177 KP kona-ba abuzu seksuál ba menór. Kona-ba polisia haruka fila kazu Violénsia Doméstika, JSMP esplika katak polisia la bele haruka fila kazu VD

tanba natureza nu'udar krime públiku. JSMP mós sita artigu 211 Kódigu Prosesu Penál kona-ba partisipasaun: Ajente polisiál ne'ebé iha koñesimentu kona-ba krime ruma tenke halo kedas partisipasaun kona-ba krime ne'e. Entretantu kona-ba aman la tau-matan ba menór ka nia oan sira, JSMP esplika katak lei la bandu atu ema fahe malu/divórsiu, maibé kuandu akontese divórsiu, tantu feen ka la'en iha obrigasaun hanesan atu tau-matan ba interese menór sira hanesan menór nia guarda, vizita no alimentasaun. Bainhira parte rua ka ida la kumpri akordu ne'ebé sira halo ona kona-ba labarik sira nia interese, inan ka aman ne'ebé la kumpri ne'e komete krime kona-ba la halotuir obrigasaun alimentár (Artigu 225 KP).

Iha sesaun enseramentu ba treinamentu ne'e Sr. Lino da Cruz nu'udar xefe Suku Lourba husu ba JSMP atu kontinua halo treinamentu sira hanesan ne'e, tanba konsidera katak justisa ne'e importante tebes.

Treinamentu ne'e realiza ho apoiu orsamentu husi UNDP liuhusi projetu Spotlight.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>